



Inatsisartut suleriaasianni § 37 imm. 1 naapertorlugu matumuuna Naalackersuisunut apeqqut imaattoq saqqummiuppara:

Naalackersuisunut apeqqut:

- 1. Avaleraasartooriarnissamut atatillugu sooq pisassiissutissanik agguaassinissamut piareersarneq taama kingusitsigaa aamma sooq taama kingusitsigisumik saqqummiunneqarpat?**
- 2. Avaleraasartooriarnissamut qinnuteqarfissaq piffissartinneqartoq 22. april 2015-imut killilerneqarsimasoq sooruna 6. maj 2015-imut kinguartinneqarsimasoq?**
- 3. Avaleraasartooriarnissamut akuersissutinik aalisariutit nunatsinneersut qanoq amerlatigippat, taakku soorunami salliutinneqarnissaa naatsorsuutigisinnaassuarpuut?**
- 4. Avaleraasartooriarnissamut pisassiissutit qaqagu agguaanneqassappat?**
- 5. 2015-imi sinerissap qanittuani qaleralittassat amerlineqarnissaat qaqagu atuutilissua?**
- 6. Imartami Kalaallit Nunatta Island-illu akornanni saarullittassiisarnerup Island-imiunut pisassaritinneqartunut naapertuunnerusumik aaqqiissuteqarfigineqarnissaa Naalackersuisut suliniuteqarfiginiarpaat?**

(Inatsisartunut Ilaasortaq Anthon Frederiksen, Partii Naleraq)

Tunngavilersuut:

Qaammatit marluk missaa qaangiuppata avaleraasartooriarluni aalisarneq aallartissaaq maannamullu suli ersarissumik aalisartussanut paasissutissanik sukumiisunik tunniussisoqarsimanani.

Taamammat qulaani apeqquaqateqarnitsinni aalisartussat piareersarnermut atatillugu, minnerungitsumillu avaleraasartoortassanik aningaasarpassuarnillu annaasaqannginnissaq anguniarlugu piaartumik paasissutissiisoqarnissaa piumasaraarput.

Sinerissap qanittuani aalisartut piniartullu peqatigiiffiata S.Q.A.P.K-p marts-i qaammalli aallartilaartoq allakkatigut sinerissap qanittuani qaleralittassat amerlineqarnissaat pillugu saaffiginnissuteqarsimavoq maannamut akissuteqarfigineqanngitsunik, taamaattumik aalisarnerup pitsaasumik ingerlanneqarnissaa aamma aalisartut pisorta qarfiullu ajunngitsumik suleqatigiinnissaat anguniarlugu apeqqutip qulaani pineqartut akineqarnissaa soqutigaarput.

Naluneqanngitsumik Island-imiut imartap Nunatta Island-illu akornani saarullit nunatsinni aalisartut qulerarterutaat sinnerlugit piasarparaat, soq imartami tassani aalisartortavut taama annikinnerutigisunik pisassinneqartuaannassappat?

Apeqqutit nunatta aningaasaqarniarneranut pingaarutilerujussuit ullut suliffiit qulit qaangiutsinnagit akissuteqarfigineqarnissaat piumasaraarput.